
BOSNA I HERCEGOVINA
Federacija Bosne i Hercegovine
KANTON SARAJEVO
GRAD SARAJEVO
GRADONAČELNIK



Grad Sarajevo
City of Sarajevo

BOSNIA AND HERZEGOVINA
Federation of Bosnia and Herzegovina
CANTON OF SARAJEVO
CITY OF SARAJEVO
MAYOR

ODLUKA
o osnivanju Javne ustanove "Muzej savremene umjetnosti ARS AEVI Sarajevo"
(prijedlog)

Predlagač: Gradonačelnik
Obrađivač: Gradska uprava

Sarajevo, novembar 2017. godine

Adresa: Hamdije Kreševljakovića 3, 71000 Sarajevo, Bosna i Hercegovina
Tel: +387 33 208 340, +387 33 443 050; **Fax:** +387 33 208 341
e-mail: grad@sarajevo.ba; **web:** www.sarajevo.ba



EYOF 2019
Sarajevo & East Sarajevo

Na osnovu člana 26. stav 1. tačka 2., tačka 10. i tačka 11. Statuta Grada Sarajeva („Službene novine Kantona Sarajevo“, broj 34/08- prečišćeni tekst), člana 3. stav 3. , a u vezi sa članom 6. Zakona o ustanovama („Službeni list R BiH, broj 6/92, 8/93 i 13/94), u vezi sa članovima 5. i 6. i 15. Zakona o muzejskoj djelatnosti („Službene novine Kantona Sarajevo“, broj 13/2017), i Odlukom o davanju saglasnosti na Sporazum radi osnivanja Javne ustanove „Muzej savremene umjetnosti ARS AEVI Sarajevo“ („Službene novine Kantona Sarajevo, broj: 41/17) Gradsko vijeće Grada Sarajeva na ___ sjednici održanoj ___.___ 2017. godine, donosi

(prijedlog)

ODLUKU o osnivanju Javne ustanove "Muzej savremene umjetnosti ARS AEVI Sarajevo"

Član 1. (Predmet Odluke)

Ovom odlukom Grad Sarajevo u svojstvu osnivača (u daljem tekstu: Osnivač) osniva Javnu ustanovu "Muzej savremene umjetnosti ARS AEVI Sarajevo" koja je gradska javna ustanova i u gradskoj svojini, osnovana za obavljanje javne službe i muzejske djelatnosti, a za čije osnivanje je utvrđeno postojanje javnog interesa.

Član 2. (Naziv i sjedište Javne ustanove)

- (1) Naziv Javne ustanove je "Muzej savremene umjetnosti ARS AEVI Sarajevo" (u daljnjem tekstu: Muzej).
- (2) Sjedište Muzeja je u Sarajevu, Ulica Terezije bb.
- (3) Naziv i sjedište Muzeja iz stava (1) i (2) ovog člana može se promijeniti.
- (4) Odluku o promjeni naziva i sjedišta Muzeja donosi Gradsko vijeće Grada Sarajevo (u daljem tekstu: Gradsko vijeće) na prijedlog Gradonačelnika Grada Sarajevo (u daljem tekstu: Gradonačelnik).

Član 4. (Svojstvo pravnog lica)

- (1) Muzej ima svojstvo pravnog lica.
- (2) Muzej ima pravo da u pravnom prometu zaključuje ugovore i vrši druge poslove i radnje u okviru svoje pravne sposobnosti i registrovane djelatnosti.

Član 5. (Djelatnost)

(1) Muzej obavlja muzejsku djelatnost u skladu sa zakonom i u odnosu na muzejski materijal kolekcije ARS AEVI, odnosno:

- istražuje, prikuplja i obrađuje muzejski materijal;
- čuva muzejski materijal od oštećenja, uništenja i nestajanja;
- obezbjeđuje mjere zaštite muzejskog materijala, posebno za vrijeme ratnog ili vanrednog stanja;
- obezbjeđuje korištenje muzejskog materijala u kulturne, naučne, vaspitno-obrazovne i druge svrhe putem njegovog prezentiranja u okviru stalnih ili povremenih izložbi i na drugi način;
- omogućava naučnim i stručnim radnicima proučavanje muzejskog materijala;
- brine se o čuvanju i održavanju muzejskog materijala koji se nalazi van muzeja na području na kojem obavlja svoju djelatnost;

- obavlja naučnoistraživački rad u skladu sa zakonom;
 - objavljuje rezultate svog stručnog i naučnoistraživačkog rada putem vlastitih publikacija i na drugi način;
 - ostvaruje saradnju na području Bosne i Hercegovine i međunarodnu saradnju u oblasti muzejske djelatnosti;
 - obavlja i druge poslove utvrđene zakonom i pravilima muzeja.
- (2) Djelatnosti iz prethodnog stava ovog člana prema Odluci o klasifikaciji djelatnosti BiH 2010 odgovaraju sljedećim područjima, oblastima, granama i razredima:
- Područje J Inforancije i komunikacije, Oblast 58 Izdavačka djelatnost, Grana Izdavanje knjiga, periodičnih publikacija i ostale izdavačke djelatnosti, razredi: 58.11 Izdavanje knjiga, 58.14 Izdavanje časopisa i periodičnih publikacija, 58.19 Ostala izdavačka djelatnost;
 - Područje M Stručne, naučne i tehničke djelatnosti, Oblast 70 Upravljačke djelatnosti, Grana 70.1 Upravljačka djelatnost, razred 70.10 upravljačke djelatnosti;
 - Područje O Javna uprava i odbrana;Obavezno socijalno osiguranje, Oblast 84 Javna uprava i odbrana;Obavezno socijalno osiguranje, Grana 84.1 Javna uprava te ekonomska i socijalna politika zajednice, razred 84.12 Reguliranje djelatnosti javnih subjekata koji pružaju zdravstvenu zaštitu, usluge u obrazovanju i kulturi i druge društvene usluge, osim obaveznog socijalnog osiguranja;
 - Područje P Obrazovanje, Oblast 85 Obrazovanje, Grana 85.5 Ostalo obrazovanje i poučavanje, razredi: 85.52 Obrazovanje i poučavanje u području kulture, 85.59 Ostalo obrazovanje i poučavanje, dn;
 - Područje R Umjetnost, zabava i rekreacija, Oblast 90 Kreativne, umjetničke i zabavne djelatnosti, Grana 90.0 Kreativne, umjetničke i zabavne djelatnosti, razredi: 90.03 Umjetničko stvaralaštvo, 90.04. Rad umjetničkih objekata, Oblast 91 Biblioteke, arhivi, muzeji i ostale kulturne djelatnosti, Grana 91.0 Biblioteke, arhivi, muzeji i ostale kulturne djelatnosti, razredi 91.02 Djelatnost muzeja, 91.03 Rad historijskih mjesta i građevina, te sličnih znamenitosti za posjetioce.
- (3) Muzej ne može promijeniti djelatnost iz stava 1. i 2. ovog člana bez saglasnosti Osnivača.
- (4) Djelatnost Muzeja može se proširiti ili promjeniti, a Muzej može obavljati i drugu djelatnost koja je od značaja za obavljanje muzejske djelatnosti i ostvarivanje prava korisnika, u skladu sa zakonom.
- (3) Odluku o proširenju ili promjeni djelatnosti donosi Gradsko vijeće na prijedlog Gradonačelnika.

Član 6.

(Finansiranje i sredstva za rad)

- (1) Za potrebe osnivanja i početka rada Muzeja Osnivač obezbjeđuje iznos od 1.000,00 KM (slovima: jednahiljada konveribilnih maraka).
- (2) Izvori sredstava za rad Muzeja su:
- sredstva Osnivača;
 - sredstva iz naplate ulaznica;
 - sredstva iz naknada za obavljanje intelektualnih i drugih usluga;
 - iz legata, poklona, zavještenja i drugih izvora u skladu sa zakonom.
- (3) Višak prihoda nad rashodima Muzej koristi za obnavljanje i razvoj djelatnosti.
- (4) Ako u obavljanju muzejske i druge djelatnosti Muzej ostvari dobit, ta se dobit upotrebljava isključivo za obavljanje i razvoj muzejske djelatnosti, u skladu sa zakonom.
- (5) Muzej je odgovoran za svoje obaveze sredstvima sa kojima raspolaže.
- (6) Osnivač Muzeja nije supsidijarno odgovoran za obaveze Muzeja.

Član 7. (Organ upravljanja)

- (1) Organ upravljanja u Muzeju je Upravni odbor od tri člana.
- (2) Jedna trećina članova Upravnog odbora, po pravilu, imenuje se iz reda stručnih radnika zaposlenih u Muzeju.
- (3) Predsjednika i članove Upravnog odbora imenuje i razrješava, u ime Osnivača, Gradonačelnik, u skladu sa statutarnim ovlaštenjima, na mandat od četiri godine uz mogućnost ponovnog imenovanja.
- (4) Osnivač odnosno Gradonačelnik može razriješiti predsjednika i članove upravnog odbora i prije vremena na koje je imenovan, ako utvrdi da je odgovoran za neuspješan ili nezakonit rad ustanove, na njegov lični zahtjev i u drugim slučajevima utvrđenim zakonom i pravilima Muzeja.
- (5) Upravni odbor ima ovlaštenja utvrđena zakonom.

Član 8. (Organ rukovođenja)

- (1) Organ rukovođenja u Muzeju je direktor.
- (2) Direktora Muzeja imenuje Upravni odbor na osnovu konkursa koji se objavljuje u javnim glasilima, uz saglasnost Gradonačelnika i u skladu sa zakonom..
- (3) Direktor Muzeja ne može biti član Upravnog odbora.
- (4) Direktor Muzeja organizuje i rukovodi radom Muzeja, zastupa i predstavlja Muzej prema trećim licima i odgovoran je za zakonitost rada Muzeja i ima ostala ovlaštenja i dužnosti utvrđena zakonom.
- (5) Osnivač je saglasan da izvršni organ Grada u postupku notarske obrade osnivačkog akta imenuje organ rukovođenja, koji će predstavljati i zastupati Muzej, a kojim aktom će se detaljno regulisati njegova ovlaštenja i odgovornosti, a u skladu sa zakonom.
- (6) Direktora Muzeja razrješava Upravni odbor u skladu sa zakonom.

Član 9. (Organ kontrole poslovanja)

- (1) Organ kontrole poslovanja u Muzeju je Nadzorni odbor od tri člana.
- (2) Predsjednika i članove Nadzornog odbora imenuje i razrješava Gradonačelnik u skladu sa zakonom.
- (3) Najmanje jedan član Nadzornog odbora imenuje se iz reda stručnih radnika zaposlenih u Muzeju.
- (4) Mandat članova Nadzornog odbora je četiri godine uz mogućnost ponovnog imenovanja
- (5) Nadzorni odbor ima ovlaštenja utvrđena zakonom.

Član 10 (Opći akti Muzeja)

- (1) Osnovni opći akt Muzeja su Pravila Muzeja.
- (2) Ustanova može imati i druge opće akte, u skladu sa zakonom, kolektivnim ugovorom i Pravilima ustanove, a kojima će regulirati i razraditi procedure rada, sistematizaciju radnih mjesta, radne odnose, kao i druga pitanja od značaja za rad Muzeja, u skladu sa zakonom.
- (3) Opće akte Muzeja donosi Upravni odbor u skladu sa Zakonom.
- (4) Gradonačelnik daje saglasnost na sve opće akte Muzeja.
- (5) Upravni odbor Muzeja donijet će Pravila, akt o unutrašnjoj organizaciji i druga akta u roku od 30 dana od njihovog imenovanja.

Član 11.
(Ostvarivanje radnih prava)

Radnici Muzeja ostvaruju prava u skladu sa zakonom, kolektivnim ugovorom, Pravilima Muzeja i drugim općim aktima Muzeja.

Član 12.
(Finansijsko poslovanje)

Finansijsko poslovanje Muzeja vrši se u skladu sa propisima koji regulišu ovu oblast.

Član 13.
(Program rada i izvještaj o rezultatima poslovanja)

- (1) Upravni odbor na početku godine za kalendarsku godinu na prijedlog direktora utvđuje planove rada i razvoja, kao i godišnji program rada, o čemu informiše Gradsko vijeće i pribavlja njihovu saglasnost.
- (2) Upravni odbor najmanje jedanput godišnje podnosi izvještaj Gradskom vijeću o radu i poslovanju ustanove, a koji obavezno sadrži i : izvještaj o izvršenju godišnjeg programa rada, izvještaj o finansijskom poslovanju, izvještaj o radu upravnog odbora i izvještaj o radu nadzornog odbora.
- (3) Organi Muzeja su u obavezi da dostavljaju i druge informacije o svom radu i poslovanju na zahtjev Osnivača.

Član 14.
(Međusobna prava i obaveze)

- (1) Na prava i obaveza između Osnivača i Muzeja koja nisu regulisana ovom odlukom, shodno se primjenjuju odredbe zakona.
- (2) Osnivač će Muzeju obezbijediti osnovni fond muzejskog materijala onog značaja i obima koji omogućava proučavanje i prezentaciju kulturno-historijskog razvoja područja na kojem muzej obavlja svoju djelatnost, potrebnu opremu kao i adekvatan prostor za smještaj zbirke.
- (3) Obaveza Muzeja je da izvrši prijem, popis, razvrstavanje i izlaganje muzejskog materijala u skladu sa zakonom i podzakonskim aktima koji reguliraju ovu oblast, kao i da poduzima sve potrebne aktivnosti za ispunjavanja uvjeta za rad u skladu sa zakonom, normativima i standardima.

Član 15.
(Prestanak Muzeja)

- (1) Na prestanak Muzeja shodno se primjenjuju odredbe zakona.
- (2) U slučaju prestanka rada Muzeja, Osnivač će odrediti muzej ili drugo pravno lice koje će preuzeti muzejski materijal Muzeja koji prestaje sa radom.

Član 16.
(Upis u registar i ovlaštenja)

- (1) Osnivanje Muzeja, organizovanje, statusne i druge promjene i prestanak Muzeja se upisuju se upisuje u odgovarajući sudski registar ustanova, na zahtjev ovlaštenog lica.
- (2) Upis u sudski registar ima pravno dejstvo prema trećim licima od dana upisa.
- (3) Pred registra iz stava 1. ovog člana, Muzej se upisuje u Registar muzeja koje vodi resorno ministarstvo.

(4) Muzej je dužan da dostavi ministarstvu sve potrebne podatke za upis u registar, kao i da blagovremeno vrši registraciju promjena.

(5) Ovlašćuje se Gradonačelnik da u ime Osnivača potpiše osnivački akt i sve isprave potrebne za osnivanje Muzeja, kao i sve isprave za koje je u skladu sa važećim zakonskim propisima neophodna notarska obrada. Gradonačelnik je ovlašten i da ovlasti postupajućeg notara na preduzimanje potrebnih radnji potrebnih za upis u nadležne registre.

(6) Odstupanje od odredbi ove Odluke u notarskoj obradi osnivačkog akta dozvoljeno je samo u mjeri u kojoj će se akt prilagoditi zakonskim odredbama i za potrebe ispravke tehničkih greški.

Član 17. (Nadzor)

(1) Stručni nadzor nad radom Muzeja i uprave vrši Muzej Sarajeva.

(2) Nadzor nad zakonitošću rada Muzeja vrši Osnivač.

Član 18. (Izmjene i dopune Odluke)

Izmjene i dopune Odluke vrše se na način i po postupku za njeno donošenje.

Član 19. (Ravnopravnost spolova)

Odredbe ove Odluke odnose se podjednako na lica muškog i ženskog spola, bez obzira na rod imenice upotrebljen u tekstu Odluke.

Član 20. (Prijelazne i završne odredbe)

(1) Rok za imenovanje članova Upravnog i Nadzornog odbora Muzeja je 30 dana od dana upisa Muzeja u sudski registar.

(2) Na pitanja koja nisu regulisana ovom odlukom shodno se primjenjuju odredbe zakona i podzakonskih akata koji reguliraju ovu oblast.

Član 21. (Stupanje na snagu)

Ova Odluka stupa na snagu narednog dana od dana objavljivanja u "Službenim novinama Kantona Sarajevo".

PREDSJEDAVAJUĆI GRADSKOG VIJEĆA

Igor dr. Gavrić

Broj:
Sarajevo,

OBRAZLOŽENJE

PRAVNI OSNOV

Pravni osnov za donošenje ove odluke sadržan je u članu 26. stav 1. tačka 2., tačka 10. i tačka 11. Statuta Grada Sarajeva kojim je propisano da Gradsko vijeće donosi odluke, druge propise i opće akte i daje njihovo tumačenje i upravlja i rasplaže imovinom Grada Sarajeva, kao i da osniva javne ustanove od interesa za Grad Sarajevo, kao i u članu 3. stav 3. Zakona o ustanovama, kojim je propisano da javnu ustanovu može osnovati, između ostalog i skupština gradske zajednice, a što je u skladu sa Statutom Grada Sarajeva u konkretnom slučaju Gradsko vijeće Grada Sarajeva, kada nadležna skupština odnosno Gradsko vijeće ocijeni da za njeno osnivanje postoji javni interes, a koji je u konkretnom slučaju i utvrđen, i članu 6. Zakona o ustanovama koji propisuje da osnivač donosi akt o osnivanju ustanove, a u vezi sa članovima 5, 6 i 15. Zakona o muzejskoj djelatnosti, kojim se propisuje da muzejsku djelatnost obavlja muzej i da organizacija za muzejsku djelatnost može biti javna i samostalna, te da se kao takva upisuje u sudski registar kao ustanova, da se na rad muzeja primjenjuju odredbe kojima se uređuje rad ustanova, ako nije drugačije određeno i da se muzej osniva kao ustanova za obavljanje muzejske djelatnosti u svim oblicima svojine.

Sporazumom o namjeri osnivanja Javne ustanove „Muzej savremene umjetnosti ARS AEVI Sarajevo“, između Grada Sarajeva, Udruženje građana „Umjetnost epohe“ – ARS AEVI i Fondacije ARS AEVI, a na koji je Gradsko vijeće Grada Sarajeva na sjednici održanoj dana 27.09.2017. godine dalo svoju saglasnost donošenjem Odluke o davanju saglasnosti na Sporazum radi osnivanja Javne ustanove „Muzej savremene umjetnosti ARS AEVI Sarajevo“ („Službene novine Kantona Sarajevo, broj: 41/17), a nakon čijeg donošenja i stupanja na snagu se pristupilo potpisivanju navedenog sporazuma, Grad Sarajevo je iskazao namjeru na pristupanje osnivanju javne ustanove koja će institucionalno da skrbi za kolekciju ARS AEVI.

RAZLOZI ZA DONOŠENJE

Uzimajući u obzir značaj kolekcije ARS AEVI koja predstavlja zbirku umjetničkih djela čiji su stvaraoci umjetnici najvećeg internacionalnog ugleda i da je arhitektonske projekte za budući Muzej svjetske umjetnosti u Sarajevu, a u koji će biti smještena ova epohalna zbirka djela savremene umjetnosti izradio najpoznatiji arhitekta savremenog doba Renzo Piano, koji je time dao nemjerljiv doprinos razvoju kulturnog identiteta grada Sarajeva, cijeneći umjetnički i arhitektonski sadržaj i značaj Projekta ARS AEVI s aspekta posjedovanja najviših svjetskih vrijednosti, činjenicu da kulturološke, umjetničke, arhitektonske, turističko/ekonomske, edukativne i promotivne komponente projekta ARS AEVI imaju veliki, sveobuhvatni i dugoročni značaj za razvoj i promociju grada Sarajeva, države Bosne i Hercegovine i regije, a sa krajnjim ciljem da kolekcija ARS AEVI dobije status muzejske zbirke kojoj će biti obezbjeđena institucionalna skrb od strane javne ustanove, a u isključivoj službi društvene zajednice i sa ciljem njenog razvoja, otvorena za javnost i uspostavljena u skladu sa zakonom, pristupilo se izradi teksta Sporazuma o namjeri osnivanja Javne ustanove „Muzej savremene umjetnosti ARS AEVI Sarajevo“, između Grada Sarajeva, Udruženje građana „Umjetnost epohe“ – ARS AEVI i Fondacije ARS AEVI, a na koji je Gradsko vijeće Grada Sarajeva na sjednici održanoj dana 27.09.2017. godine dalo svoju saglasnost donošenjem Odluke o davanju saglasnosti na Sporazum radi osnivanja Javne ustanove „Muzej savremene umjetnosti ARS AEVI Sarajevo“ („Službene novine Kantona Sarajevo, broj: 41/17), a nakon čijeg donošenja i stupanja na snagu se pristupilo potpisivanju navedenog sporazuma. Potpisanim Sporazumom Grad je izrazio namjeru da pristupi osnivanju javne ustanove koja će institucionalno da skrbi za kolekciju ARS AEVI.

Osnivanje muzeja savremene umjetnosti je od neupitnog i izuzetnog društvenog značaja za grad Sarajevo, kao glavni grad države Bosne i Hercegovine, a čime će se promovirati svoj kosmopolitski karaktere i opredjeljenost da se svrsta u skupinu kulturnih prijestonica svijeta, a što je i u skladu sa ciljevima i misijom Grada Sarajeva

definiranim u Nacrtu politika Grada Sarajeva za mandatni period 2016-2020, a koje su dobile podršku i kao takve upućene u javnu raspravu na sjednici Gradskog vijeća Grada Sarajeva održanoj 25.10.2017. godine.

OBRAZLOŽENJE PREDLOŽENIH RJEŠENJA

Članom 1. definira se predmet Odluke, daje naziv osnivača, te određuje javnopravni status ustanove, njena svojina i cilj njenog osnivanja, a što je u skladu sa članovima 3. i 6. Zakona o ustanovama, te članovima 3., i 5. Zakona o muzejskoj djelatnosti.

Članom 2. Odluke određuje se naziv i sjedište ustanove, kao obavezni elementi koje treba da sadrži osnivački akt ustanove u skladu sa članom 6. Zakona o ustanovama. Članom 4. definirano je svojstvo javne ustanove kao pravnog lica i pravna sposobnost ustanove u pravnom prometu.

Članom 5. Odluke razrađene su djelatnosti ustanove koja se formira kao Muzej i koja kao takva vrši muzejsku djelatnost u skladu sa Zakonom o muzejskoj djelatnosti i to one koje su taksativno navedene u članu 18. Zakona. Obavljanje druge djelatnosti koja je od značaja za obavljanje muzejske djelatnosti i ostvarivanje prava korisnika mora biti u skladu sa zahtjevom člana 43. stav 1. Zakona o muzejskoj djelatnosti. Djelatnosti su razvrstane i prema Odluci o klasifikaciji djelatnosti BiH 2010, a što je zakonska obaveza za svaki pravni subjekt bilo komercijalnog ili nekomercijalnog karaktera, a za potrebe statističke evidencije i obrade. Uslovljanja promjene djelatnosti Muzeja odredbama zakona i saglasnošću osnivača imperativna je zakonska odredba.

Finansiranje, sredstva za rad i odgovornost za obaveze Muzeja iz člana 6. Odluke su rješenja koja su u cijelosti usklađena sa članovima 39., 40. i 41. Zakona o ustanovama, kao i članom 7. i 43. Zakona o muzejskoj djelatnosti. Obzirom da zakoni eksplicitno ne određuju visinu sredstava za osnivanje, iznos se odredio analogno iznosu potrebnom za osnivanje javnog preduzeća, a u skladu sa Zakonom o privrednim društvima u Federaciji BiH.

Članovi 7., 8. i 9. reguliraju organe javne ustanove, njihova ovlaštenja i dužnosti u skladu sa članovima 24., 25., 26., 27., 28., 29., 30., 31., 32., 33., 34. i 35. Zakona o ustanovama i članovima 19. i 20. Zakona o muzejskoj djelatnosti, s tim da se na pitanja koja nisu detaljno regulirana Odlukom shodno primjenjuju citirane odredbe zakona. Određivanje lica koje će do imenovanja organa rukovođenja predstavljati i zastupati ustanovu i imati ovlaštenja i odgovornosti je u skladu sa obavezom iz člana 6. stav 2. Alineja 9. Zakona o ustanovama.

Kako član 6. Zakona o ustanovama propisuje da se u osnivačkom aktu mora precizirati rok za donošenje pravila ustanove (koja imaju status njenog statuta), a članovi 37. i 38. Zakona preciziraju vrste općih akata, član 10. Odluke je razradio ove zakonske odredbe.

Članovi 11., 12., 13., 14. i 15. Odluke su usaglašeni sa odredbama članova 4., 6., 27., 32. i 35. Zakona o ustanovama, kao i članom 52. Zakona i članom 14. Zakona o muzejskoj djelatnosti.

Odreda člana 16. Odluke usaglašena je sa odredbama članova 46. do 51. Zakona o ustanovama, kao i članom 31. Zakona o muzejskoj djelatnosti. Kako je upis u odgovarajući sudski registar uslovljen notarskom obradom osnivačkog akta, član 16. Odluke je dao ovlaštenje Gradonačelniku da kod notara potpiše osnivački akt, te da je odstupanje od odredbi Odluke u notarskoj obradi osnivačkog akta dozvoljeno je samo u mjeri u kojoj će se akt prilagoditi zakonskim odredbama i za potrebe ispravke tehničkih greški.

Član 17. Odluke u cijelosti je usklađen sa članovima 44. i 45. Zakona o muzejskoj djelatnosti.

Članovi 18 do 21. Odluke slijede normativni standard koji se zahtjeva u izradi propisa i regulira pitanja izmjena i dopuna Odluke, ravnopravnosti spolova u terminologiji, prijelazne i završne odredbe i stupanje na snagu i pitanje objave u službenom glasilu.

FINANSIJSKA SREDSTVA

Finansijska sredstva za provedbu ove Odluke obezbjedit će se u Budžetu Grada Sarajeva za 2018. godinu.